



Peqqissutsimut Ilaqutariinnermullu Pisortaqaarfik
Direktoratet for Sundhed og Familie

ATASSUT

Att. Inatsisartuni ilaasortat:

Augusta Salling, Emilie Olsen, Kristian Jeremiassen, Thomas Kristensen
aamma Godmand Rasmussen

Inatsisartut suleriaasianni § 36, imm. 1 naapertorlugu saqqummiusaaq, kræftimik nappaatillit katsorsarneqarsinnaajunnaartutullu nalilernerqarsimasut nunatsinni najugaqartut misileraataasumik katsorsarneqarsinnaalernissaat periarfissaalersissallugu, Naalakkersuisut suliniutigissallugu pilersaaruteqarnersut pillugu apeqqut, pillugu.

Asasakka Inatsisartuni ilaasortat

21.01.2008
Postboks 1160
3900 Nuuk
Oq/tel +299 34 50
00
Fax +299 32 55 05
peqqip@gh.gl
www.nanoq.gl/peqq
ik

Naalakkersuisut sinnerlugit matumuuna, kræftimik nappaatillit katsorsarneqarsinnaajunnaartutullu nalilernerqarsimasut nunatsinni najugaqartut misileraataasumik katsorsarneqarsinnaalernissaat periarfissaalersissallugu Naalakkersuisut suliniuteqassanersut pillugu allakkatigut 11. januar 2008-mi apeqquteqaatersi akissuteqarfigissavara.

Ilisimatitsissutigaarsi ATASSUT UPA 2007-imi tamatumunnga assingusumik siunnersuuteqarmat, taannali Inatsisartuni ilalernerqanngitsoortoq.

Taamanikkut Inatsisartut Peqqissutsimut ataatsimiititaliaata Isumaliutissiissutimi inassutigaa, peqqissaartumik isumaliutigisariaqartoq nappaatini ataatsimoor-tuni sorliit aamma napparsimasut qanoq amerlatigisut, neqeroorutaasinnaasumut ilaatinneqassanersut kiisalu siunnersuut qanoq aningaasalersorneqassanersoq.

Peqqinnissaqaarfik amerlanerusunik aningaasaliiffigineqassava imaluunniit aningaasaliissutissat peqqinnissaqaarfiup nammineq sinaakkusiussaasa iluanni naneqassappat aamma napparsimasut suliaritinnerillu sorliit tulleriissaarinermi kinguartinneqartassappat – sunalu tunngavigalugu? Kræftimik nappaatillit kisimik misileraataasumik katsorsartinnissaminnut neqeroorfigineqartassappat imaluunniit nappaatinik eqqugaasimasut ataatsimoortut allat aamma misileraataasumik katsorsartinnissaminnut neqeroorfigineqartassappat?

1. januar 2003-miilli Danmarkimi “second opinion ordning”-i tassa aqqqissugaq aqqutigalugu nunani allani misileraataasumik katsorsartinnissamut innersuussi-soqarsinnaavoq, tamatumalu ingerlanneqarneqarnera ulluinnarni Sundhedsstyrelsimit isumagineqartarpoq. Aqqqissuussinermi napparsimasut napparsimavinnilu immikkoortortat periarfissaqaarput, Danmarkimi imaluunniit nunani allani, kræftimik nappaateqartut imaluunniit allanik toqussutaasinnaasunik nappaatillit, allatut katsorsarneqarnissaminnut neqeroorfigineqarsinnaanngorlutik.

Aqqqissuussineq 1. januar 2005-imi annertunerulersinneqarpoq aammattaq Danmarkimi kræftimik nappaatillit misileraataasumik katsorsartinnissamut periarfissaqalersillugit.

Sundhedsstyrelsen 2006-imut ukiumoortumik naatsorsuusuaani takuneqarsinnaavoq, suliat 934-it suliarineqarsimasut – 2005-imut naleqqiullugu qaffariaat 17 %-iulluni. Napparsimasut 601-it – napparsimasut 64 %-iisut amerlatigisut nakorsat kræftimik paasisimasagarluartut naliliinerat malillugu, Danmarkimi misileraataasumik katsorsartinnissaat siunnersuutigineqarpoq. Napparsimasut 30-it, napparsimasut 3 %-annik amerlassuseqartut, nakorsat paasisimasagarluartut siunnersuinerat malillugu nunani allani (Schweiz, Irland aamma Tysklandimi) nakorsartinnissaat siunnersuutigineqarpoq. Suliani 96-ini paasisimasallit maanna katsorsartinnissamut neqerooruteqartarnissamut isumaqataapput, sulianilu 92-ini katsorsartinnissamut allanik siunnersuutissaqaratik.

Paasisimasallit siunnersuinerat malinneqassanersoq imaluunniit malinneqassannginnersoq, nakorsap/immikkoortortap innersuussuteqartup napparsimasoq isumasioqatigereerlugu inaarutaasumik isummerfigineqarnissaa aalajangissavaa.

Sundhedsstyrelsen aqqissuussineq juni 2005-imi nalilersorpaa nalilersuinermilu ersepoq, napparsimasut siviunerusumik inuunissaannut imaluunniit ajorunaarsinneqarnissaannut tunngatillugu malitsigisassanut naliliinissaq ajornassasoq, kisiannili amerlanertigut katsorsartinnissamik innersuussutigineqartut inuunermik sivitsuisartut aamma ippinnarunaarsitsinermik katsorsaanagerusartut, naatsorsuutigisamillu inuunerup siviunerulersarnerata sunniutaa qaammatialunguanik siviussuseqartartoq.

Qulaani pineqartut tunngavigalugit Naalackersuisut isumaqarput, nunatsinni najugaqartunik kræftimik nappaatilinnik misileraataasumik katsorsaasarnissamik eqqussinissaq pillugu pissutsit erseqqissaavigineqanngitsut siunnersuummi amerlaqisut.

Nappaatit ataatsimoortut sorliit misileraataasumik katsorsarneqartassappat? Napparsimasut qanoq amerlatigisut tamatumani pineqarpat? Nunarput danskit aqqissuussinerannut ilanngunneqassava? Siunnersuutip piviusunngortinnissaanut aningaasat sumit pineqassappat? Siunnersuut malitsiginnaasanik sunik allanik kinguneqassava il.il.?

Napparsimasut toqussutaasinnaasunik nappaateqartut sapinngisamik pitsaanerpaamik atugaqarnissaat naalackersuisut qulakkeerusuppaat. Taamaattumik naalackersuisut aalajangerput, ataatsimiititaliamik suligasuartussamik pilersitsiniarlutik, suliasaqarfimmi misissueqqissaartussamik nalunaarusiortussamillu, kræftimik nappaatillit misileraataasumik katsorsarneqartarnissaat pillugu neqeroorfigineqarsinnaanerisa eqqunneqarnissaannut malitsiginnaasanik tamanik qulaajaasussamik.

Inussiarnersumik inuulluaqqusillunga

Arkalo Abelsen

Ilaqutariinnermut Peqqissutsimullu Naalackersuisoq